

C40
4514
(160)



80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

C40-4514



B-64853

頓悟入道要門論序

夫善知識者如巨海舟航能度迷類長夜明炬善研
羣昏大珠和尚首叅馬祖使入慧海之灑界令開寶
藏於自家所以靈辯滔滔譬大川之流水峻機疊疊
如圓器之傾珠於是曲設多方垂慈利物發揚至道
烏可以筆舌讚歎哉妙叶維那四明翠山大中理公
之神足夙具靈根素培智種禪餘之暇閱此老語錄
有所證入平生礙膺之物脫然而去從上佛祖舌頭
一無所疑矣此亦古塔主親雲門語而嗣之正所謂
也故捐資鏤板以廣其傳期以後之來者同一了悟

支那

頁字 五五五 命長 二五

存此心者豈淺淺耶此之功勳不墜行願彌堅蓋可見矣所幾法流不泯派永接於曹谿燈焰長存光愈明於少室者也 肯歲在癸丑春孟十日阿育王山沙門釋崇裕書於無異堂

頓悟入道要門論卷上

合丁參問語錄

唐沙門慧海撰

稽首和南十方諸佛諸大菩薩眾弟子今作此論恐不會聖心願賜懺悔若會聖理盡將迴施一切有情願於來世盡得成佛

問欲修何法卽得解脫答唯有頓悟一門卽得解脫云何爲頓悟答頓者頓除妄念悟者悟無所得問從何而修答從根本修云何從根本修答心爲根本云何知心爲根本答楞伽經云心生卽種種法生心滅卽種種法滅維摩經云欲得淨土當淨其心隨其心

淨卽佛土淨遺教經云但制心一處無事不辦經云
聖人求心不求佛愚人求佛不求心智者調心不調
身愚人調身不調心佛名經云罪從心生還從心滅
故知善惡一切皆由自心所以心爲根本也若求解
脫者先須識根本若不達此理虛費功勞於外相求
無有是處禪門經云於外相求雖經劫數終不能成
於內覺觀如一念頃卽證菩提問夫修根本以何法
修答惟坐禪禪定卽得禪門經云求佛聖智要卽禪
定若無禪定念想喧動壞其善根問云何爲禪云何
爲定答妄念不生爲禪坐見本性爲定本性者

無生心定者對境無心八風不能動八風者利
譽稱譏苦樂是名八風若得如是定者雖是凡夫卽
入佛位何以故菩薩戒經云衆生受佛戒卽入諸佛
位得如是者卽名解脫亦名達彼岸超六度越三界
大力菩薩無量力尊是大丈夫 問心住何處卽位
答住無住處卽住問云何是無住處處答不住一切處
卽是住無住處云何是不住一切處答不住一切處
者不住善惡有無內外中間不住空亦不住不空不
住定亦不住不定卽是不住一切處只箇不住一切
處卽是住處也得如是者卽名無住心也無住心者

是佛心問其心似何物答其心不青不黃不赤不白
不長不短不去不來非垢非淨不生不滅湛然常寂
此是本心形相也亦是本身本身者卽佛身也 問
身心以何爲見是眼見耳見鼻見及身心等見答見
無如許種見云旣無如許種見復何見答是自性見
何以故爲自性本來清淨湛然空寂卽於空寂體中
能生此見問只如清淨體尚不可得此見從何而有
答喻如明鑑中雖無像能見一切像何以故爲明鑑
無心故學人若心無所染妄心不生我所心滅自然
清淨以清淨故能生此見法句經云於畢竟空

機

然建立是善知識也 問涅槃經金剛身品不可見
了了見無有知者無不知者云何答不可見者爲自
性體無形不可得故是名不可見也然見不可得者
體寂湛然無有去來不離世流世流不能流坦然自
在卽是了了見也無有知者爲自性無形本無分別
是名無有知者無不知者於無分別體中具有恒沙
之用若能分別一切卽無事不知是名無不知者般
若偈云般若無知無事不知般若無見無事不見
問經云不見有無卽眞解脫何者是不見有無答證
得淨心時卽名有於中不生得淨心想卽名不見有

也得想無生無住不得作無生無住想卽是不見無也故云不見有無也楞嚴經云知見立知卽無明本知見無見斯卽涅槃亦名解脫 問云何是無所見答若見男子女人及一切色像於中不起愛憎與不見等卽是無所見也問對一切色像時卽名爲見不對色像時亦名見否答見問對物時從有見不對物時云何有見答今言見者不論對物與不對物何以故爲見性常故有物之時卽見無物之時亦見也故知物自有去來見性無來去也諸根亦耳問正見物時見中有物否答見中不立物問正見無物時見中

有無物否答見中不立無物 問有聲時卽有聞無聲時還得聞否答亦聞問有聲時從有聞無聲時云何得聞答今言聞者不論有聲無聲何以故爲聞性常故有聲時卽聞無聲時亦聞問如是聞者是誰答是自性聞亦名知者聞 問此頓悟門以何爲宗以何爲旨以何爲體以何爲用答無念爲宗妄心不起爲旨以清淨爲體以智爲用問旣言無念爲宗未審無念者無何念答無念者無邪念非無正念云何爲邪念云何名正念念答念有念無卽名邪念不念有無卽名正念念善念惡名爲邪念不念善惡名爲正念

乃至苦樂生滅取捨怨親憎愛並名邪念不念苦樂
等卽名正念問云何是正念答正念者唯念菩提問
菩提可得否答菩提不可得問旣不可得云何唯念
菩提答只如菩提假立名字實不可得亦無前後得
者爲不可得故卽無有念只箇無念是名真念菩提
無所念無所念者卽一切處無心是無所念只如止
說如許種無念者皆是隨事方便假立名字皆同一
體無二無別但知一切處無心卽是無念也得無念
時自然解脫 問云何行佛行答不行一切行卽名
佛行亦名正行亦名聖行如前所說不行有無憎愛

等是也大律卷五菩薩品云一切聖人不行於衆生
行衆生不行如是聖行 問云何是正見答見無所
見卽名正見問云何名見無所見答見一切色時不
起染著不染著者不起愛憎心卽名見無所見也若
得見無所見時卽名佛眼更無別眼若見一切色時
起愛憎者卽名有所見有所見者卽是衆生眼更無
別眼作衆生眼乃至諸根亦復如是 問旣言以智
爲用者云何爲智答知二性空卽是解脫知二性不
空不得解脫是名爲智亦名了邪正亦名識體用二
性空卽是體知二性空卽是解脫更不生疑卽名爲

用言二性空者不生有無善惡愛憎名二性空問此門從何而入答從檀波羅蜜入問佛說六波羅蜜是菩薩行何故獨說檀波羅蜜云何具足而得入也答迷人不解五度皆因檀度生但修檀度卽六度悉皆具足問何因緣故名爲檀度答檀者名爲布施問布施何物答布施却二性問云何是二性答布施却善惡性布施却有無性愛憎性空不空性定不定性淨不淨性一切悉皆施却卽得二性空若得二性空時亦不得作二性空想亦不得作念有施想卽是真行檀波羅蜜名萬緣俱絕萬緣俱絕者卽一切法性空

是也法性空者卽一切處無心是若得一切處無心時卽無有一相可得何以故爲自性空故無一相可得無一相可得者卽是實相實相者卽是如來妙色身相也金剛經云離一切諸相則名諸佛問佛說六波羅蜜今云何說一卽能具足願說一具六法之因答思益經云網明尊謂梵天言若菩薩捨一切煩惱名檀波羅蜜卽是布施於諸法無所延名尸波羅蜜卽是持戒於諸法無所傷名羸提波羅蜜卽是忍辱於諸法離相名毗離耶波羅蜜卽是精進於諸法無所住名禪波羅蜜卽是禪定於諸法無戲論名般若

波羅蜜卽是智慧是名六法今更名六法不異一捨
二無起三無念四離相五無住六無戲論如是六法
隨事方便假立名字至於妙理無二無別但知一捨
卽一切捨無起卽一切無起迷途不契悉謂有差愚
者滯其法數之中卽長輪生死告汝學人但修檀之
法卽萬法周圓況於五法豈不具耶 問三學等用
何者是三學云何是等用答三學者戒定慧是也問
其義云何是戒定慧答清淨無染是戒知心不動對
境寂然是定知心不動時不生不動想知心清淨時
不生清淨想乃至善惡皆能分別於中無染得自在

者是名爲慧也若知戒定慧體俱不可得時卽無分
別者卽同一體是名三學等用 問若心住淨時不
是著淨否答得住淨時不作住淨想是不著淨問心
住空時不是著空否答若作空想卽名著空問若心
得住無住處時不是著無所處否答但作空想卽無
有著處汝若欲了了識無所住心時正坐之時但知
心莫思量一切物一切善惡都莫思量過去事已過
去而莫思量過去心自絕卽名無過去事未來事未
至莫願莫求未來心自絕卽名無未來事現在事已
現在於一切事但知無著無著者不起憎愛心卽是

無著現在心自絕卽名無現在事三世不攝亦名無三世也心若起去時卽莫隨去去心自絕若住時亦莫隨住住心自絕卽無住心卽是住無住處也若了了自知住在住時只物住亦無住處亦無無住處也若自了了知心不住一切處卽各了了見本心也亦各了了見性也只箇不住一切處心者卽是佛心亦名解脫心亦名菩提心亦名無生心亦名色性空經云證無生法忍是也汝若未得如是之時努力努力勤加用功功成自會所以會者一切處無心卽是會言無心者無假不真也假者愛憎心是也真者無愛

憎心是也但無憎愛心卽是二性空二性空者自然解脫也 問爲只坐用行時亦得爲用否答今言用功者不獨言坐乃至行住坐臥所造運爲一切時中常用無間卽名常住也 問方廣經云五種法身一實相法身二功德法身三法性法身四應化法身五虛空法身於自己身何者是答知心不壞是實相法身知心含萬像是功德法身知心無心是法性法身隨根應說是應化法身知心無形不可得是虛空法身若了此義者卽知無證也無得無證者卽是證佛法法身若有證有得以爲證者卽邪見增上慢人也

名爲外道何以故維摩經云舍利弗問天女曰汝何所得何所證辯乃得如是天女答曰我無得無證乃得如是若有得有證卽於佛法中爲增上慢人也

問經云等覺妙覺云何是等覺云何是妙覺答卽色卽空名爲等覺二性空故名爲妙覺又云無覺無無覺名爲妙覺也問等覺與妙覺爲別爲不別答爲隨事方便假立二名本體是一無二無別乃至一切法皆然也 問金剛云無法可說是名說法其義云何答般若體畢竟清淨無有一物可得是名無法可說卽於般若空寂體中具恒沙之用卽無事不知是名

說法故云無法可說是名說法問若有善男子善女人受持讀誦此經若爲人輕賤是人先世罪業應墮惡道以今世人輕賤故先世罪業卽爲消滅當得阿耨多羅三藐三菩提其義云何答只如有人未遇大善知識唯造惡業清淨本心被三毒無明所覆不能顯了故云爲人輕賤也以今世人輕賤者卽是今日發心求佛道爲無明滅盡三毒不生卽本心明朗更無亂念諸惡永滅故以今世人輕賤也無明滅盡亂念不生自然解脫故云當得菩提卽發心時名爲今世非隔生也又云如來五眼者何答見色清淨名爲

肉眼見體清淨名爲天眼於諸色境乃至善惡悉能
微細分別無所染著於中自在名爲慧眼見無所見
名爲法眼無見無無見名爲佛眼又云大乘最上乘
其義云何答大乘者是菩薩乘最上乘者是佛乘又
問云何修而得此乘答修菩薩乘者卽是大乘證菩
薩乘更不起觀至無修處湛然常寂不增不減名最
上乘卽是佛乘也 問涅槃云定多慧少不離無明
定少慧多增長邪見定慧等故卽名解脫其義如何
答對一切善惡悉能分別是慧於所分別之處不起
愛憎不隨所染是定卽是定慧等用也又問無言無

說卽名爲定正言說之時得名定否答今言定者不
論說與不說常定何以故爲用定性言說分別時卽
言說分別亦定若以空心觀色時卽觀色時亦空若
不觀色不說不分別時亦空乃至見聞覺知亦復如
是何以故爲自性空卽於一切處悉空空卽無著無
著卽是等用爲菩薩常用如是等空之法得至究竟
故云定慧等者卽名解脫也今更爲汝譬喻顯示令
汝惺惺得解斷疑譬如明鑑照像之時其明動否不
也不照時亦動否不也何以故爲明鑑用無情明照
所以照時不動不照亦不動何以故爲無情之中無

有動者亦無不動者又如日光照世之時其光動否不也若不照時動否不也何以故爲光無情故用無情光照所以不動不照亦不動照者是慧不動者是定菩薩用是定慧等法得三菩提故云定慧等用卽是解脫也今言無情者無凡情非無聖情也問云何是凡情云何是聖情答若起二性卽是凡情二性空故卽是聖情 問經云言語道斷心行處滅其義如何答以言顯義得義言絕義卽是空空卽是道道卽是絕言故云言語道斷心行處滅謂得義實際更不起觀不起觀故卽是無生以無生故卽一切色性空

色性空故卽萬緣俱絕萬緣俱絕者卽是心行處滅 問如如者云何答如如是不動義心真如故名如如也是知過去諸佛行此行亦得成道現在佛行此行亦得成道未來佛行此行亦得成道三世所修證道無異故名如如也維摩經云諸佛亦如也至於彌勒亦如也乃至一切衆生悉皆如也何以故爲佛性不斷有性故也 問卽色卽空卽凡卽聖是頓悟否 答是問云何是卽色卽空云何是卽凡卽聖答心有染卽色心無染卽空心有染卽凡心無染卽聖又云真空妙有故卽色色不可得故卽空今言空者是色

性自空非色滅空今言色者是空性自色非色能色也問經云盡無盡法門如何答爲二性空故見聞無生是盡盡者諸漏盡無盡者於無生體中具恒沙妙用隨事應現悉皆具足於本體中亦無損減是名無盡卽是盡無盡法門也問盡與無盡爲一爲別答體是一說卽有別問體既是一云何說別答一者是說之體說之體之用爲隨事應用故云體同說別喻如天上一日下置種種盆器盛水一一器中皆有於日諸器中日悉皆圓滿與天上日亦無差別故云體同爲隨器立名卽有差別所以有別故云體同說卽

有別所現諸日悉皆圓滿於上本日亦無損減故云無盡也問經云不生不滅何法不生何法不滅答不善不生善法不滅問何者善何者不善答不善者是染漏心善法者是無染漏心但無染無漏卽是不善不生得無染無漏時卽清淨圓明湛然常寂畢竟不遷是名善法不滅也此卽是不生不滅問菩薩戒云衆生受佛戒卽入諸佛位位同大覺已真是諸佛子其義云何答佛戒者清淨心是也若有人發心修行清淨行得無所受心者名受佛戒也過去諸佛皆修清淨無受行得成佛道今有時人發心修無受

清淨行者即與佛功德等用無有異也故云入諸佛位也如是悟者與佛悟同故云位同大覺已真是諸佛子從清淨心生智智清淨名爲諸佛子亦名此佛子 問只是佛之與法爲是佛在先爲是法在先若法在先法是何佛所說若佛在先承何教而成道答佛亦在法先亦在法後問因何佛法先後答若據寂滅法是法先佛後若據文字法是佛先法後何以故一切諸佛皆因寂滅法而得成佛即是法先佛後經云諸佛所師所爲法也得成道已然始廣說十二部經引化衆生衆生承佛法教修行得成佛即是法先

佛後也

問云何是說通宗不通答言行相違即是

說通宗不通問云何是宗通說亦通答言行無差即是說通宗亦通 問經云不到不到之法云何

答說到行不到名爲到不到行到說不到名爲不到到行說俱到名爲到到 問佛法不盡有爲不住無

爲何者是不盡有爲何者是不住無爲答不盡有爲者從初發心至菩提樹下成等正覺後至雙林入般

涅槃於中一切法悉皆不捨即是盡有爲也不住無爲者雖修無念不以無念爲證雖修空不以空爲

證雖修菩提涅槃無相無作不以無相無作爲證即

撰述
是不住無爲也。問爲有地獄爲無地獄答亦有亦無問云何亦有亦無答爲隨心所造一切惡業卽有地獄若心無染自性空故卽無地獄。問受罪衆生有佛性否答亦同佛性問既有佛性正入地獄時佛性同入否答不同入問正入之時佛性復在何處答亦同入問既同入正入時衆生受罪佛性亦同受罪否答佛性雖隨衆生同入是衆生自受罪苦佛性元來不受問既同入因何不受答衆生者是有相有相者卽有成壞佛性者是無相無相者卽是空性也是故真空之性無有壞者喻如有人於空積薪薪自受

壞空不受壞也空喻佛性薪喻衆生故云同入而不
同受也。問轉八識成四智束四智成三身幾箇識
共成一智幾箇識獨成一智答眼耳鼻舌身此五識
共成所作智第六是意獨成妙觀察智第七心識
獨成平等性智第八含藏識獨成大圓鏡智問此四
智爲別爲同答體同名別問體既同云何名別既隨
事立名正一體之時何者是大圓鏡智答湛然空寂
圓明不動卽大圓鏡智能對諸塵不起愛憎卽是二
性空二性空卽平等性智能入諸根境界善能分別
不起亂想而得自在卽是妙觀察智能令諸根隨事

撰述
應用悉入正受無二相者卽是成所作智問束四智
成三身者幾箇智共成一身幾箇智獨成一身答大
圓鏡智獨成法身平等性智獨成報身妙觀察智與
成所作智共成化身此三身亦假立名字分別只令
未解者看若了此理亦無三身應用何以故爲體性
無相從無住本而立亦無無住本 問云何是見佛
真身答不見有無卽是見佛真身問云何不見有無
卽是見佛真身答有因無立無因有顯本不立有無
亦不存既不存無有從何得有之與無相因始有既
相因而有悉是生滅也但離此二見卽是見佛真身

問只如有無尚不可交建立真身復從何而立答爲
有問故若無問時真身之名亦不可立何以故譬如
明鏡若對物像時卽現像若不對像時終不見像
問云何是常不離佛答心無起滅對境寂然一切時
中畢竟空寂卽是常不離佛 問何者是無爲法答
有爲是問今問無爲法因何答有爲是答有因無立
無因有顯本不立有無從何生若論真無爲者卽不
取有爲亦不取無爲是真無爲法也何以故經云若
取法相卽著我人若取非法相卽著我人是故不應
取法不應取非法卽是取真法也若了此理卽真解

脫卽會不二法門。問何者是中道義答邊義是問今問中道因何答邊義是答邊因中立中因邊生本若無邊中從何有今言中者因邊始有故知中之與邊相因而立悉是無常色受想行識亦復如是。問何名五陰等答對色染色隨色受生名爲色陰爲領納入八風好集邪信卽隨領受中生名爲受陰迷心取想隨想受生名爲想陰結集諸行隨行受生名爲行陰於平等體妄起分別繫著虛識受生名爲識陰故云五陰。問經云二十五有何者是答受後有身是也後有身者卽六道受生也爲衆生現世心迷好

結諸業後卽隨業受生故云後有也世若有人志修究竟解脫證無生法忍者卽永離三界不受後有不受後有者卽證法身法身者卽是佛身問二十五有名云何分別答本體是一爲隨用立名顯二十五有二十五有十惡十善五陰是問云何是十惡十善答十惡煞盜姪妄言綺語兩舌惡口乃至貪瞋邪見此名十惡十善者但不行十惡卽是也。問上說無念由未盡決答無念者一切處無心是無一切境界無餘思求是對諸境色永無起動是卽無念無念者是名真念也若以念爲念者卽是邪念非爲正念何以

故經云若教人六念名爲非念有六念名爲邪念無六念者卽真念經云善男子我等住於無念法中得如是金色三十二相放大光明照無餘世界不可思議功德佛說之猶不盡何況餘乘能知也得無念者六根無染故自然得入諸佛知見得如是者卽名佛藏亦名法藏卽能一切佛一切法何以故爲無念故經云一切諸佛等皆從此經出問旣稱無念入佛知見復從何立答從無念立何以故經云從無住本立一切法又云喻如明鑑鑑中雖無像而能現萬像何以故爲鑑明故能現萬像學人爲心無染故妄念不

生我人心滅畢竟清淨以清淨故能生無量知見頓悟者不離此生卽得解脫何以知之譬如師子兒初生之時卽真師子修頓悟者亦復如是卽修之時卽入佛位如竹春生筍不離於春卽與母齊等無有異何以故爲心空故修頓悟者亦復如是爲頓除妄念永絕我人畢竟空寂卽與佛齊等無有異故云卽凡卽聖也修頓悟者不離此身卽超三界經云不壞世間而超世間不捨煩惱而入涅槃不修頓悟者猶如野干隨逐師子經百千劫終不得成師子又問真如之性爲實空爲實不空若言不空卽是有相若言空

者卽是斷滅一切衆生當依何修而得解脫答真如之性亦空亦不空何以故真如妙體無形無相不可得也是名亦空然於空無相體中具足恒沙之用卽無事不應是名亦不空經云解一卽千從迷一卽萬惑若人守一萬事畢是悟道之妙也經云森羅及萬像一法之所印云何一法中而生種種見如此功業由行爲本若不降心依文取證無有是處自誑誑他彼此俱墜努力努力細細審之只是事來不受一切處無心得如是者卽入涅槃證無生法忍亦名不二法門亦名無諍亦名一行三昧何以故畢竟清淨無

我人故不起愛憎是二性空是無所見卽是真如無得之辯此論不傳無信唯傳同見同行當觀前人有誠信心堪任不退者如是之人乃可爲說示之令悟吾作此論爲有緣人非求名利只如諸佛所說千經萬論只爲衆生迷故心行不同隨邪應說卽有差別如論究竟解脫理者只是事來不受一切處無心永寂如空畢竟清淨自然解脫汝莫求虛名口說真如心似猿猴卽言行相違名爲自誑當墮惡道莫求一世虛名快樂不覺長劫受殃努力努力衆生自度佛不能度若佛能度衆生時過去諸佛如微塵數一切

衆生總應度盡何故我等至今流浪生死不得成佛
當知衆生自度佛不能度努力努力自修莫倚他佛
力經云夫求法者不著佛求 問於來世中多有雜
學之徒云何共住答但和其光不同其業同處不同
住經云隨流而性常也只如學道者自爲大事因緣
解脫之事俱勿輕未學敬學如佛不高已德不疾彼
能自察於行不舉他過於一切處悉無妨礙自然快
樂也重說偈云

忍辱第一道 先須除我人同事來無所受
卽眞菩提身

金剛經云菩薩無我法者如來說名眞是菩薩又云
不取卽不捨永斷於生死一切處無心卽名諸佛子
涅槃經云如來證涅槃永斷於生死偈曰

我今意況大好 他人罵時無惱

無言不說是非 涅槃生死同道

識達自家本宗 猶來無有青阜

一切妄想分別 將知世人不了

寄言凡夫未代 除却心中蘘草

我今意況大寬 不語無事心安

從容自在解脫 東西去易不難

終日無言寂寞

念念向理思看

自然逍遙見道

生死定不相干

我今意況大奇

不向世上侵欺

榮華總是虛誑

弊衣麤食充飢

道逢世人懶語

世人咸說我癡

外現瞪瞪暗鈍

心中明若瑠璃

默契羅睺密行

非汝凡夫所知

吾恐汝等不會了真解脫理再示汝等

問維摩經

云欲得淨土當淨其心云何是淨心答以畢竟淨爲

淨問云何是畢竟淨爲淨答無淨無無淨卽是畢竟

淨問云何是無淨無無淨答一切處無心是淨得淨之時不得作淨想卽名無淨也得無淨時亦不得作無淨想卽是無無淨也 問修道者以何爲證答畢竟證爲證問云何是畢竟證答無證無無證是名畢竟證問云何是無證云何是無無證答於外不染色聲等於內不起妄念心得如是者卽名爲證得證之時不得作證想卽名無證也得此無證之時亦不得作無證想是名無證卽名無無證也 問云何解脫心答無解脫心亦無無解脫心卽名真解脫也經云法尚應捨何況非法也法者是有非法是無也但不

取有無卽眞解脫。問云何得道答以畢竟得爲得。問云何是畢竟得答無得無無得是名畢竟得。問云何是畢竟空答無空無無空卽名畢竟空。問云何是眞如定答無定無無定卽名眞如定。經云無有定法名阿耨多羅三藐三菩提亦無定法如來可說。經云雖修空不以空爲證不得作空想卽是也。雖修定不以定爲證不得作定想卽是也。雖得淨不以淨爲證不得作淨想卽是也。若得定得淨得一切處無心之時卽作得如是想者皆是妄想卽被繫縛不名解脫。若得如是之時了了自知得自在卽不得將此

爲證亦不得作如是想。時得解脫。經云若起精進心是妄非精進也。若能心不妄精進無有涯。問云何是中道答無中間亦無二邊卽中道也。云何是二邊答爲有彼心有此心卽是二邊。云何名彼心此心答外縛色聲名爲彼心內起妄念名爲此心。若於外不染色卽名無彼心內不生妄念卽名無此心。此非二邊也。心旣無二邊中亦何有哉。得如是者卽名中道。眞如來道如來道者卽一切覺人解脫也。經云虛空無中邊諸佛身亦然。然一切色空者卽一切處無心也。一切處無心者卽一切色性空二義無別亦名色

空亦名色無法也汝若離一切處無心得菩提解脫
涅槃寂滅禪定見性者非也一切處無心者卽修菩
提解脫涅槃寂滅禪定乃至六度皆見性處何以故
金剛經云無有少法可得是名阿耨多羅三藐三菩
提也 問若有修一切諸行具足成就得受記否答
不得問若以一切法無修得成就得受記否答不得
問若恁麼時當以何法而得受記答不以有行亦不
以無行卽得受記何以故維摩經云諸行性相悉皆
無常涅槃經云佛告迦葉諸行是常無有是處汝但
一切處無心卽無諸行亦無無行卽名受記所言一

切處無心者無憎愛心是言憎愛者見好事不起愛
心卽名無愛心也見惡事亦不起憎心卽名無憎心
也無愛者卽名無染心卽是色性空也色性空者卽
是萬緣俱絕萬緣俱絕者自然解脫汝細看之若未
惺惺了時卽須早問勿使空度汝等若依此教修不
解脫者吾卽終身爲汝受大地獄吾若誑汝者吾當
所生處爲師子虎狼所食汝若不依教自不勤修卽
不知也一失人身萬劫不復努力努力須合知爾
頓悟入道要門論卷上

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

吳江居士吳端徵施貴列此
頓悟入道要門論上卷發光考露
了緣居士對長
萬曆丁酉夏六月

此論本無受心息長發專亦不默然
其言本無受心息長發專亦不默然
其言本無受心息長發專亦不默然
其言本無受心息長發專亦不默然

故東

諸方門人叅問語錄卷下

合上頓悟要論

師初至江西叅馬祖祖問從何處來曰越州大雲寺
來祖曰來此擬須何事曰來求佛法祖曰自家寶藏
不顧拋家散走作什麼我這裏一物也無求什麼佛
法師遂禮拜問曰阿那箇是慧海自家寶藏祖曰卽
今問我者是汝寶藏一切具足更無欠少使用自在
何假向外求覓師於言下大悟識自本心不由知覺
踊躍禮謝師事六載後以受業師年老遽歸奉養乃
晦迹藏用外示癡訥自撰頓悟入道要門論一卷法
門師姪玄晏竊出江外呈馬祖祖覽訖謂衆曰越州

有大珠圓明光透自在無遮障處也衆中有知師姓

朱者迭相推識結契來越上尋訪依附時號大珠和

尚也師諱慧海建州人依越大雲寺道智和尚受業

師謂學徒曰我不會禪竝無一法可示於人故不勞

汝久立且自歇去時學侶漸多日夜叩激事不得已

隨問隨答其辯無礙時有法師數人來謁曰擬伸

一問師還對否師曰深潭月影任意撮麼問如何是

佛師曰清潭對面非佛而誰衆皆忪然法眼云是即

沒交涉良久其僧又問師說何法度人師曰貧道未

曾有一法度人曰禪師家渾如此師却問曰大德說

何法度人曰講金剛般若經師曰講幾座來曰二十

餘座師曰此經是阿誰說僧抗聲曰禪師相弄豈不

知是佛說耶師曰若言如來有所說法則爲謗佛是

人不解我所說義若言此經不是佛說則是謗經請

大德說看僧無對師少頃又問經云若以色見我以

音聲求我是人行邪道不能見如來大德且道阿那

箇是如來曰某甲到此却迷去師曰從來未悟說什

麼却迷僧曰請禪師爲說師曰大德講經二十餘座

却不識如來其僧再禮拜願垂開示師曰如來者是

諸法如義何得忘却曰是是諸法如義師曰大德是

諸法如義何得忘却曰是是諸法如義師曰大德是

亦未是曰經文分明那得未是師曰大德如否曰如師曰木石如否曰如師曰大德如同木石如否曰無二師曰大德與木石何別僧無對乃歎云此上人者難爲酬對良久却問如何得大涅槃師曰不造生死業對曰如何是生死業師曰求大涅槃是生死業捨垢取淨是生死業有得有證是生死業不脫對治門是生死業曰云何即得解脫師曰本自無縛不用求解直用直行是無等等僧曰如禪師和尚者實謂希有禮謝而去

有行者問即心即佛那箇是佛師云汝疑那箇不是

佛指出看無對師曰達即徧境是不悟永乖踈

有律師法明謂師曰禪師家多落空師曰却是座主家多落空法明大驚曰何得落空師曰經論是紙墨文字紙墨文字者俱空設於聲上建立名句等法無非是空座主執滯教體豈不落空法明日禪師落空否師曰不落空曰何却不落空師曰文字等皆從智慧而坐大用現前那得落空法明日故知一法不達不名悉達師曰律師不唯落空兼乃錯用名言法明作色問曰何處是錯師曰律師未辨華竺之音如何講說曰請禪師指出法明錯處師曰豈不知悉達是

梵語耶律師雖省過而心猶憤然具梵語薩婆曷刺他悉陀中國翻云

一切義成舊云悉逢多猶是訛略具語

又問曰夫經律論是佛語讀

誦依教奉行何故不見性師曰如狂狗趁塊師子咬

人經律論是自性用讀誦者是性法 法明又曰阿

彌陀佛有父母及姓否師曰阿彌陀姓憍尸迦父名

月上母名殊勝妙顏曰出何教文師曰出陀羅尼集

法明禮謝讚歎而退

有三藏法師問真如有變易否師曰有變易三藏曰

禪師錯也師却問三藏有真如否曰有師曰若無變

易決定是凡僧也豈不聞善知識者能迴三毒為三

聚淨戒迴六識為六神通迴煩惱作菩提迴無明為

大智真如若無變易三藏真是自然外道也三藏曰

若爾者真如即有變易師曰若執真如有變易亦是

外道曰禪師適來說真如有變易如今又道不變易

如何即是的當師曰若了了見性者如摩尼珠現色

說變亦得說不變亦得若不見性人聞說真如變便

作變解聞說不變便作不變解三藏曰故知南宗實

不可測

有道流問世間有法過自然否師曰有曰何法過得

師曰能知自然者曰元氣是道否師曰元氣自元氣

師曰能知自然者曰元氣是道否師曰元氣自元氣

撰述
道自道曰若如是者則應有二師曰知無兩人又問
云何爲邪云何爲正師曰心逐物爲邪物從心爲正
有源律師來問和尚修道還用功否師曰用功曰如
何用功師曰飢來喫飯困來即眠曰一切人總如是
同師用功否師曰不同曰何故不同師曰他喫飯時
不肯喫飯百種須索睡時不肯睡千般計校所以不
同也律師杜口

有韞光大德問禪師自知生處否師曰未曾死何用
論生知生卽是無生法無離生法說有無生祖師云
當生卽不生曰不見性人亦得如此否師曰自不見

性不是無性何以故見卽是性無性不能見識卽是
性故名識性了卽是性喚作了性能生萬法喚作法
性亦名法身馬鳴祖師云所言法者謂衆生心若心
生故一切法生若心無生法無從生亦無名字迷人
不知法身無象應物現形遂喚青青翠竹總是法身
鬱鬱黃華無非般若黃華若是般若般若卽同無情
翠竹若是法身法身卽同草木如人喫筍應總喫法
身也如此之言寧堪齒錄對面迷佛長劫希求全體
法中迷而外覓是以解道者行住坐臥無非是道悟
法者縱橫自在無非是法 大德又問太虛能生靈

撰述
智否真心緣於善惡否貪欲人是道否執是執非人
向後心通否觸境生心人有定否住於寂寞人有慧
否懷於傲物人有我否執空執有人有智否尋文取
證人苦行求佛人離心求佛人執心是佛人此皆稱
道否請禪師一一開示師曰太虛不生靈智真心不
緣善惡嗜欲深者機淺是非交爭者未通觸境生心
者少定寂寞忘機者慧沈傲物高心者我壯執空執
有者皆愚尋文取證者益滯苦行求佛者俱迷離心
求佛者外道執心是佛者爲魔大德曰若如是應畢
竟無所有師曰畢竟是大德不是畢竟無所有大德

踊躍禮謝而去

師上堂曰諸人幸自好箇無事人苦死造作要擔枷
落獄作麼每日至夜奔波道我參禪學道解會佛法
如此轉無交涉也只是逐聲色走有何歇時貧道聞
江西和尚道汝自家寶藏一切具足使用自在不假
外求我從此一時休去自己財寶隨身受用可謂快
活無一法可取無一法可捨不見一法生滅相不見
一法去來相徧十方界無一微塵許不是自家財寶
但自子細觀察自心一體三寶常自現前無可疑慮
莫尋思莫求覓心性本來清淨故華嚴經云一切法

不生一切法不滅若能如是解諸佛常現前又淨名
經云觀身實相觀佛亦然若不隨聲色動念不逐相
貌生解自然無事去莫久立珍重 此日大衆普集
久而不散師曰諸人何故在此不去貧道已對面相
呈還肯休麼有何事可疑莫錯用心枉費氣力若有
疑情一任諸人恣意早問時有僧法淵問曰云何是
佛云何是法云何是僧云何是一體三寶願師垂示
師曰心是佛不用將佛求佛心是法不用將法求法
佛法無二和合爲僧卽是一體三寶經云心佛與衆
生是三無差別身口意清淨名爲佛出世三業不清

淨名爲佛滅度喻如瞋時無喜喜時無瞋唯是一心
實無二體本智法爾無漏現前如蛇化爲龍不改其
鱗衆生迴心作佛不改其面性本清淨不待修成有
證有修卽同增上慢者真空無滯應用無窮無始無
終利根頓悟用無等等卽是阿耨菩提心無形相卽
是微妙色身無相卽是實相法身性相體空卽是虛
空無邊身萬行莊嚴卽是功德法身此法身者乃是
萬化之本隨處立名智用無盡名無盡藏能生萬法
名本法藏具一切智是智慧藏萬法歸如名如來藏
經云如來者卽諸法如義又云世間一切生滅法無

撰述
有一法不歸如也

有客問云弟子未知律師法師禪師何者最勝願和尚慈悲指示師曰夫律師者啓毗尼之法藏傳壽命之遺風洞持犯而達開遮秉威儀而行軌範牒三番羯磨作四果初因若非宿德白眉焉敢造次夫法師者踞師子之座瀉懸河之辯對稠人廣衆啓鑿玄關開般若妙門等三輪空施若非龍象蹴蹋安敢當斯夫禪師者撮其樞要直了心源出沒卷舒縱橫應物咸均事理頓見如來拔生死深根獲現前三昧若不安禪靜慮到這裏總須忙然隨機授法三學雖殊得

意忘言一乘何異故經云十方佛土中唯有一乘法無二亦無三除佛方便說但以假名字引導於衆生客曰和尚深達佛旨得無礙辯 又問儒道釋三教爲同爲異師曰大量者用之卽同小機者執之卽異總從一性上起用機見差別成三迷悟由人不在教之異同

講唯識道光座主問曰禪師用何心修道師曰老僧無心可用無道可修曰旣無心可用無道可修云何每日聚衆勸人學禪修道師曰老僧尚無卓錫之地什麼處聚衆來老僧無舌何曾勸人來曰禪師對面

妄語師曰老僧尚無舌勸人焉解妄語曰某甲却不
會禪師語論也師曰老僧自亦不會

講華嚴志座主問何故不許青青翠竹盡是法身鬱
鬱黃華無非般若師曰法身無象應翠竹以成形般
若無知對黃華而顯相非彼黃華翠竹而有般若法
身也故經云佛真法身猶若虛空應物現形如水中
月黃華若是般若般若即同無情翠竹若是法身翠
竹還能應用座主會麼曰不了此意師曰若見性人
道是亦得道不是亦得隨用而說不滯是非若不見
性人說翠竹著翠竹說黃華著黃華說法身滯法身

說般若不識般若所以皆成諍論志禮謝而去

人問將心修行幾時得解脫師曰將心修行喻如滑
泥洗垢般若玄妙本自無生大用現前不論時節曰
凡夫亦得如此否師曰見性者即非凡夫頓悟上乘
超凡越聖迷人論凡論聖悟人超越生死涅槃迷人
說事說理悟人大用無方迷人求得求證悟人無得
無求迷人期遠劫證悟人頓見

維摩座主問經云彼外道六師等是汝之師因其出
家彼師所墮汝亦隨墮其施汝者不名福田供養汝
者墮三惡道謫於佛毀於法不入衆數終不得減度

撰述
言門 亦用古名
九
汝若如是乃可取食今請禪師明爲解說師曰迷徇
六根者號之爲六師心外求佛名爲外道有物可施
不名福田生心受供墮三惡道汝若能詢於佛者不
不著佛求毀於法者是不著法求不入衆數者是不
著僧求終不得滅度者智用現前若有如是解者便
得法喜禪悅之食

有行者問有人問佛答佛問法答法喚作一字法門
不知是否師曰如鸚鵡學人語話自語不得爲無智
慧故譬如將水洗水將火燒火都無義趣

人問言之與語爲同爲異師曰一也謂言成句名語

矣且如靈辯滔滔譬大川之流水峻機疊疊如圓器
之傾珠所以廓萬象號懸河剖乎義海此是語也言
者一字表心也內著玄微外現妙相萬機撓而不亂
清濁混而常分齊王猶慙大夫之辭文殊尚歎淨名
之說今之常人云何能解

源律師問禪師常譚卽心是佛無有是處且一地菩
薩分身百佛世界二地增於十倍禪師試現神通看
師曰闍黎自己是凡是聖曰是凡師曰旣是凡僧能
問如是境界經云仁者心有高下不依佛慧此之是
也又問禪師每云若悟道現前身便解脫無有是處

師曰有人一生作善忽然偷物入手卽身是賊否曰
故知是也師曰如今了了見性云何不得解脫曰如
今必不可須經三大阿僧祇始得師曰阿僧祇劫
還有數否源抗聲曰將賊比解脫道理得通否師曰
闍黎自不解道不可障一切人解自眼不開瞋一切
人見物源作色而去云雖老渾無道師曰卽行去者
是汝道

講止觀慧座主問禪師辨得魔否師曰起心是天魔
不起心是陰魔或起不起是煩惱魔我正法中無如
是事曰一心三觀義又如何師曰過去心已過去未

來心未至現在心無住於其中間更用何心起觀曰
禪師不解止觀師曰座主解否曰解師曰如智者大
師說止破止說觀破觀住止沒生死住觀心神亂爲
當將心止心爲復起心觀觀若有心觀是常見法若
無心觀是斷見法亦有亦無成二見法請座主子細
說看曰若如是問俱說不得也師曰何曾止觀

人問般若大否師曰大曰幾許大師曰無邊際曰般
若小否師曰小曰幾許小師曰看不見曰何處是師
曰何處不是

維摩座主問經云諸菩薩各入不二法門維摩默然

是究竟否師曰未是究竟聖意若盡第三卷更說何
事座主良久曰請禪師爲說未究竟之意師曰如經
第一卷是引衆呼十大弟子住心第二諸菩薩各說
入不二法門以言顯於無言文殊以無言顯於無言
維摩不以言不以無言故默然收前言語也第三卷
從默然起說又顯神通作用座主會麼曰竒怪如是
師曰亦未如是曰何故未是師曰且破人執情作如
此說若據經意只說色心空寂令見本性教捨僞行
入真行莫向言語紙墨上討意度但會淨名兩字便
得淨者本體也名者迹用也從本體起迹用從迹用

歸本體體用不二本迹非殊所以古人道本迹雖殊
不思議一也一亦非一若識淨名兩字假號更說什
麼究竟與不究竟無前無後非本非末非淨非名只
示衆生本性不思議解脫若不見性人終身不見此
理

僧問萬法盡空識性亦爾譬如水泡一散更無再合
身死更不再生卽是空無何處更有識性師曰泡因
水有泡散可卽無水身因性起身死豈言性滅曰旣
言有性將出來看師曰汝信有明朝否曰信師曰找
將明朝來看曰明朝實是有如今不可得師曰明朝

不可得不是無明朝汝自不見性不可是無性今見
著衣喫飯行住坐臥對面不識可謂愚迷汝欲見明
朝與今日不異將性覓性萬劫終不見亦如有人不
見日不是無日

講青龍疏座主問經云無法可說是名說法禪師如
何體會師曰爲般若體畢竟清淨無有一物可得是
名無法卽於般若空寂體中具河沙之用卽無事不
知是名說法故云無法可說是名說法

講華嚴座主問禪師信無情是佛否師曰不信若無
情是佛者活人應不如死人死驢死狗亦應勝於活
人經云佛身者卽法身也從戒定慧生從三明六通
生從一切善法生若說無情是佛者大德如今便死
應作佛去

有法師問持般若經最多功德師還信否師曰不信
曰若爾靈驗傳十餘卷皆不堪信也師曰生人持孝
自有感應非是白骨能有感應經是文字紙墨文字
紙墨性空何處有靈驗靈驗者在持經人用心所以
神通感物試將一卷經安著案上無人受持自能有
靈驗否

僧問未審一切名相及法相語之與默如何通會卽

得無前後師曰一念起時本來無相無名何得說有前後不了名相本淨妄計有前有後夫名相關鎖非智鑰不能開中道者病在中道二邊者病在二邊不知現用是無等等法身迷悟得失常人之法自起生滅埋沒正智或斷煩惱或求菩提背却般若

人問律師何故不信禪師曰理幽難顯名相易持不見性者所以不信若見性者號之爲佛識佛之人方能信入佛不遠人而人遠佛佛是心作迷人向文字中求悟人向心而覺迷人修因待果悟人了心無相迷人執物守我爲已悟人般若應用見前愚人執空

執有生滯智人見性了相靈通乾慧辯者口疲大智體了心泰菩薩觸物斯照聲聞怕境界昧心悟者日用無生迷人見前隔佛

人問如何得神通去師曰神性靈通徧周沙界山河石壁去來無礙刹那萬里往返無踪火不能燒水不能溺愚人自無心智欲得四大飛空經云取相凡夫隨宜爲說心無形相卽是微妙色身無相卽是實相實相體空喚作虛空無邊身萬行莊嚴故云功德法身卽此法身是萬行之本隨用立名實而言之只是清淨法身也

撰述
人問一心修道過去業障得消滅否師曰不見性人
未得消滅若見性人如日照霜雪又見性人猶如積
草等須彌山只用一星之火業障如草智慧似火曰
云何得知業障盡師曰見前心通前後生事猶如對
見前佛後佛萬法同時經云一念知一切法是道場
成就一切智故

有行者問云何得住正法師曰求住正法者是邪何
以故法無邪正故曰云何得作佛去師曰不用捨衆
生心但莫污染自性經云心佛及衆生是三無差別
曰若如是解者得解脫否師曰本自無縛不用求解

法過語言文字不用數句中求法非過現未來不可
以因果中契法過一切不可比對法身無象應物現
形非離世間而求解脫

僧問何者是般若師曰汝疑不是者試說看又問云
何得見性師曰見卽是性無性不能見又問如何是
修行師曰但莫污染自性卽是修行莫自欺誑卽是
修行大用現前卽是無等等法身又問性中有惡否
師曰此中善亦不立曰善惡俱不立將心何處用師
曰將心用心是大顛倒曰作麼生卽是師曰無作麼
生亦無可是

人問有人乘船船底刺殺螺蜆爲是人受罪爲復船當罪師曰人船兩無心罪正在汝譬如狂風折樹損命無作者無受者世界之中無非衆生受苦處

僧問未審託情勢指境勢語默勢乃至揚眉動目等勢如何得通會於一念間師曰無有性外事用妙者動寂俱妙心真者語默總真會道者行住坐臥是道爲迷自性萬惑茲生又問如何是法有宗旨師曰隨其所立即有衆義文殊於無住本立一切法曰莫同太虛否師曰汝怕同太虛否曰怕師曰解怕者不同太虛又問言方不及處如何得解師曰汝今正說時

疑何處不及

有宿德十餘人同問經云破滅佛法未審佛法可破滅否師曰凡夫外道謂佛法可破滅二乘人謂不可破滅我正法中無此二見若論正法非但凡夫外道未至佛地者二乘亦是惡人又問真法幻法空法非空法各有種性否師曰夫法雖無種性應物俱現心幻也一切俱幻若有一法不是幻者幻卽有定心空也一切皆空若有一法不空空義不立迷時人逐法悟時法由人如森羅萬象至空而極百川衆流至海而極一切賢聖至佛而極十二分經五部毗尼五圍

撰述
陀論至心而極心者是總持之妙本萬法之洪源亦
名大智慧藏無住涅槃百千萬名盡心之異號耳又
問如何是幻師曰幻無定相如旋火輪如乾闥婆城
如機關木人如陽燄如空華俱無實法又問何名大
幻師師曰心名大幻師身爲大幻城名相爲大幻衣
食河沙世界無有幻外事凡夫不識幻處處迷幻業
聲聞怕幻境昧心而入寂菩薩識幻法達幻體不拘
一切名相佛是大幻師轉大幻法輪成大幻涅槃轉
幻生滅得不生不滅轉河沙穢土成清淨法界
僧問何故不許誦經喚作客語師曰如鸚鵡只學人

言不得人意經傳佛意不得佛意而但誦是學語人
所以不許曰不可離文字言語別有意耶師曰汝如
是說亦是學語曰同是語言何偏不許師曰汝今諦
聽經有明文我所說者義語非文衆生說者文語非
義得意者越於浮言悟理者超於文字法過語言文
字何向數句中求是以發菩提者得意而忘言悟理
而遺教亦猶得魚忘筌得兔忘蹄也

有法師問念佛是有相大乘禪師意如何師曰無相
猶非大乘何況有相經云取相凡夫隨宜爲說又問
願生淨土未審實有淨土否師曰經云欲得淨土當

淨其心隨其心淨卽佛土淨若心清淨所在之處皆爲淨土譬如生國王家決定紹王業發心向佛道是生淨佛國其心若不淨在所生處皆是穢土淨穢在心不在國土 又問每聞說道未審何人能見師曰有慧眼者能見曰甚樂大乘如何學得師曰悟卽得不悟不得曰如何得悟去師曰但諦觀曰似何物師曰無物似曰應是畢竟空師曰空無畢竟曰應是有師曰有而無相曰不悟如何師曰大德自不悟亦無人相障 又問佛法在於三際否師曰見在無相不在其外應用無窮不在於內中間無住處三際不可

得曰此言大混師曰汝正說混之一字時在內外否曰弟子究檢內外無踪跡師曰若無踪跡明知上來語不混曰如何得作佛師曰是心是佛是心作佛曰衆生入地獄佛性入否師曰如今正作惡時更有善否曰無師曰衆生入地獄佛性亦如是曰一切衆生皆有佛性如何師曰作佛用是佛性作賊用是賊性作衆生用是衆生性性無形相隨用立名經云一切賢聖皆以無爲法而有差別 又問何者是佛師曰離心之外卽無有佛曰何者是法身師曰心是法身謂能生萬法故號法界之身起

信論云所言法者謂衆生心卽依此心顯示摩訶衍
 義 又問何名有大經卷內在一微塵師曰智慧是
 經卷經云有大經卷量等三千大千界內在一微塵
 中一塵者是一念心塵也故云一念塵中演出河沙
 偈時人自不識 又問何名大義城何名大義王師
 曰身爲大義城心爲大義王經云多聞者善於義不
 善於言說言說生滅義不生滅義無形相在言說之
 外心爲大經卷心爲大義王若不了了識心者不名
 善義只是學語人也 又問般若經云度九類衆生
 皆入無餘涅槃又云實無衆生得滅度者此兩段經

文如何通會前後人說皆云實度衆生而不取衆生
 相常疑未決請師爲說師曰九類衆生一身具足隨
 造隨成是故無明爲卵生煩惱包裹爲胎生愛水浸
 潤爲濕生修起煩惱爲化生悟卽是佛迷號衆生菩
 薩只以念念心爲衆生若了念念心體俱空名爲度
 衆生也智者於自本際上度於未形未形旣空卽知
 實無衆生得滅度者

僧問言語是心否師曰言語是緣不是心曰離緣何
 者是心師曰離言語無心曰離言語旣無心若爲是
 心師曰心無形相非離言語非不離言語心常湛然

應用自在祖師云若了心非心始解心心法

僧問如何是定慧等學師曰定是體慧是用從定起
慧從慧歸定如水與波一體更無前後名定慧等學
夫出家兒莫尋言逐語行住坐臥並是汝性用什麼
處與道不相應且自一時休歇去若不隨外境之風
性水常自湛湛無事珍重

諸方門人叅問語錄卷下

初祖菩提達磨大師安心法門附

出聯燈會要

迷時人逐法解時法逐人解時識攝色迷時色攝識

但有心分別計校自心現量者悉皆是夢若識心寂
滅無一切念處是名正覺問云何自心現量答見一
切法有有不自有自心計作有見一切法無無不自
無自心計作無乃至一切法亦如是並是自心計作
有自心計作無又若人造一切罪自見已之法王卽
得解脫若從事上得解者氣力壯從事中見法者卽
處處不失念從文字解者氣力弱卽事卽法者深從
汝種種運爲跳跟顛蹶悉不出法界若以法界入法
界卽是癡人凡有施爲皆不出法界心何以故心體
是法界故問世間人種種學問云何不得道答由見

已故所以不得道已者我也至人逢苦不憂遇樂不喜由不見已故所以不知苦樂由亡已故得至虛無已尚自亡更有何物而不亡也問說法既空阿誰修道答有阿誰須修道若無阿誰卽不須修道阿誰者亦我也若無我者逢物不生是非是者我自身是而物非是也非者我自非而物非非也卽心無心是爲通達佛道卽物不起見是名達道逢物直達知其本源此人慧眼開智者任物不任已卽無取捨違順愚人任已不任物卽有取捨違順不見一物名爲見道不行一物名爲行道卽一切處無處卽作處無作處無

作法卽見佛若見相時卽一切處見鬼取相故墮地獄觀法故得解脫若見憶想分別卽受鑊湯罽炭等事現見生死相若見法界性卽涅槃性無憶想分別卽是法界性心非色故非有用而不廢故非無又用而常空故非有空而常用故非無

昔披閱祖燈至大珠和尚傳云有頓悟入道要門論一卷思仰之久未如所願後於洪武己酉歲從壞篋中得一故册信手展卷隨覽數分如熱得涼踊躍歡喜不能自勝方視其首卽斯論也復詳披

究見其義理質直詣實如飲醍醐如得至寶後較
他錄得無差謬所願既獲不敢私祕願與一切衆
生同霑濃味復綴諸宗所問語錄一卷於後略分
上下共成一冊并逢磨大師安心法門附於卷末
總名曰頓悟要門謹捐布帛命工繡梓垂於不朽
流布十方使天下學佛之士各各了知正修行路
不墮邪見頓悟自心咸開佛慧實叶之所志願矣
洪武七年歲在甲寅春二月丙戌日比丘妙叶焚
香稽首拜題

後序

曩閱傳燈錄至大珠海禪師自初見馬祖及接人機
語以至泛應諸宗所問使之結舌喪氣心悅誠服處
未嘗不爲之慶快而不已蓋師之言一本於經律論
之要旨而卽事卽理全體全用以發明向上一機殺
活予奪縱橫逆順無不合轍而還源也所撰頓悟入
道要門論昔旣盛行年來殊不多見近四明比丘妙
叶來言嘗得此論洎他語共一編於弊篋斷簡中寧
敢私淑樂與叢林共之輒罄已長俾工復鋟諸梓願
一言識其後且出新板之文自一至六凡六葉以示

然嘗鼎一臠又何待覩其全書噫大珠此編語言文字耶非耶謂其語言文字則道非語言文字謂其非語言文字而三藏之文了了在目與此老曾襟流出者融會貫攝羅列而前陳其間或自謂我不會禪竝無一法可示於人看他此等語直是作賊人心虛盡情抖擻不下所以今日不免被人再加塗抹後之覽者若於馬祖所謂大珠圓明光透自在無遮障處當下著得精彩則隨色摩尼人人無不具足其或未然而滯殼迷封有甚麼數具頂門眼者試爲辨取
洪武六年歲在癸丑秋九月望日前龍河比丘萬金

書




吳江居士吳瑞徵施貲刻此

諸方門人奉問語錄下卷 資先妣凌氏孺人冥福 海鹽居士仇雲鵬對 長洲徐普書 澳

水端學舜刻

萬曆丁酉仲夏徑山興聖萬壽禪寺識



五世ノ才昆金宛

十三



二十七

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9